

Powšitkowne WOZJEWJENJA

njedźelu, 23. awgusta 2015

Zetkanje samostejacych w Smochćicach

Samostejacy ze serbskich wosadow su na swoje přichodne zetkanje wutoru, 1. septembra, w 14 hodź. do Domu biskopa Bena w Smochćicach přeprašeni. Zajimcy njech so prošu hač do srjedy, 26. awgusta, w redakciji Katolskeho Posoła přizjewja, telefonowe čisło (0 35 91) 55 02 12. Štóz chce wotewzaty być, njech to prošu zdželi.

Wulět serbskeje dekanatneje młodžiny

Lětuši wulět serbskeje młodžiny budže njedźelu, 6. septembra, do Slepoho a Błótow. Bus wotjědže w 10.30 hodź. na farskim dworje w Chróscicach. Wón pozastanje w 10.40 hodź. w Rablicach před faru a w 10.50 hodź. w Kulowje na torhošću. Přizjewjenja přijimuju so hač do štwórtka, 27. awgusta, w Dekanatnym dušepastyrstwje we Worklecach, telefonowe čisło (03 57 96) 9 55 95. Pozdžiše přizjewjenja njejsu hižo móžne. Wšitcy serbscy młodostni su wutrobnje na zhromadny wulět přeprašeni.

Projektowy dzeń k skrućenju džěci

Wšitke džěci wot předšulskeje staroby hač do 6. lětnika su sobotu, 19. septembra, na projektowy dzeń pod hesłom „Starkmachtag“ do Radworja přeprašene. Dalši budže 3. oktobra w Chróscicach. Dzeń zarjaduje dekanatne dušepastyrstwo we Worklecach zhromadnje z dušepastyrstwom džěci Drježdžansko-Mišnjanskeho biskopstwa. Nadrobnosće zhonja zajimcy z plakata a z wupožonych flyerow w cyrkwjach kaž tež pod www.posol.de. Přizjewjenja přijimuju so za zarjadowanje w Radworju hač do štwórtka, 10. septembra, za dalše w Chróscicach hač do 24. septembra pisomnje w dekanatnym dušepastyrstwje we Worklecach, Młynski puć 4.

Klětu budže putnikowanje do Krupki w awgusće

Putnikowanje do Krupki klětu budže hakle wot 7. do 12. awgusta. Přičina je, zo so tradicionelny termin ze swětowym zetkanjom młodžiny w Krakowje překuje. Wšitcy, kotřiž bychu rady sobu šli, měli tole při planowanju dowola wobkedźbować.